

Negara dilanda jerebu

KOSMO 14/6/12 MS 2.

KUALA LUMPUR – Kualiti udara di Lembah Klang dan Perak merosot semalam berpunca daripada pencemaran jerebu merentas sempadan dari Sumatera, Indonesia.

Jabatan Alam Sekitar (JAS) dalam satu kenyataan di sini menjangkakan keadaan berjerebu itu akan berterusan untuk beberapa hari akan datang berikutan cuaca yang diramal kering di beberapa negeri di utara dan pantai barat Semenanjung.

Katanya, laporan imej satelit NOAA-18 yang dikeluarkan oleh ASEAN Specialised Meteorological Centre menunjukkan bilangan titik panas di Sumatera, Indonesia meningkat sejak Selasa lepas,

Imej satelit itu juga menunjukkan jerebu dibawa angin dari kawasan titik panas di Wilayah Riau, Sumatera Tengah menghala ke pantai barat Semenanjung Malaysia.

Berikutan itu, JAS telah mengaktifkan Pelan Tindakan Mencegah Kebakaran Terbuka di semua negeri serta mempertingkatkan pelaksanaan prosedur standard operasi Program Pencegahan Tanah Gambut Yang Mudah Terbakar.

Ia bagi mencegah dan mengawal sebarang punca tempatan yang boleh menyumbang kepada kemerosotan kualiti udara.

Sementara itu, orang ramai dinasihatkan tidak melakukan

atau menyebabkan pembakaran terbuka.

Orang ramai juga diminta bekerjasama memadam kebakaran kecil dan melaporkan kes pembakaran terbuka kepada Jabatan Perkhidmatan Bomba dan Penyelamat di talian 999 atau JAS di talian bebas tol 1-800-88-2727.

Dalam pada itu, jurucakap Jabatan Meteorologi berkata, hujan mungkin tidak berlaku dalam tempoh beberapa hari ini.

Negara kini sedang mengalami musim barat daya, yang pada umumnya keadaan cuaca panas dan kering.

Keadaan itu dijangka berterusan sehingga September, katanya.

INFO Indeks bencana udara (IPU) setakat pukul 5 petang semalam

● Tidak Sihat (101-200):

Kawasan Cheras di Kuala Lumpur (105), Pelabuhan Klang (147) serta kawasan Shah Alam dan Kuala Selangor di Selangor masing-masing 120 dan 129.

● Sederhana (50-100):

Petaling Jaya dan Batu Muda di Kuala Lumpur masing-masing 99, Banting di Selangor (95), Sri Manjung, Perak (92), Tanah Merah, Kelantan (88), Putrajaya (78) dan Perai 74.

Petunjuk:

Baik: 0-50
Sederhana: 51-100
Tidak Sihat: 101-200
Sangat Tidak Sihat: 201-300
Berbahaya: 300 ke atas



GAMBAR: ABDUL RAZAK LATIF



KOMBINASI gambar yang menyaksikan Menara Kuala Lumpur dan Menara Berkembar Petronas ditelan Jerebu semalam (kiri) dan pemandangan bandar raya Kuala Lumpur pada sudut yang sama dirakam sebelum ini.